

張文定公靡悔軒集

張文定公靡悔軒集卷之九

墓誌銘 十三首

明故都察院右僉都御史汪公墓誌銘

公諱玉字汝成號雷峯一號嘿休系本徽之婺源
公之後 世祖泰和先生宋徽文閣大學士吏部尚書
大猷之弟也擇居鄞之大雷山曾祖諱公鏐祖諱江肇
拓生業父諱子材仁信惇固以公貴封承德郎刑部江
西清吏司主事母吳氏封安人公沉毅重厚髻鬣如成
八年十六七讀性理諸書潛思默悟慨然以古聖賢自
期若將不屑意於舉業而才思克敏得之心而注之手

跌宕雄峻自足以動人辛酉年二十一領鄉薦明年游
南雍時楓山章公爲祭酒整菴羅公爲司業大見器重
召語必移時較藝必冠多士焉戊辰舉進士觀政禮部
授刑部江西司主事轉雲南司員外郎訊覈精敏爲同
輩所推服甲戌陞湖廣按察司僉事攝辰沅兵備乙亥
督造紙劄拒請託絕侵蝕戒浮費以萬計明年仍巡辰
沅攝兵備公性簡亢不能與衆俯仰不悅於當道湖藩
六道辰沅最遠且多故故再以屬公公下上嶮巇不避
寒暑矻矻移牒不間宵晝民夷肅然惟永順宣慰司恃
其富強納賄權奸圖地之屬保靖者事久弗決相殺傷

無虛歲

朝廷勅大臣會勘或受別指欲有所左右而公持益堅
卒以理詘辭力焉永順先以黃金器若干啗公公聞之
亟命擒其使使遠逃匿至是陰令刺客伺公人多爲公
危者而公屹弗爲動難亦竟弗及也香爐山土夷叛合
湖貴兩省兵討平之公之贊畫居多在沅再募鋤奸祛
弊罄竭心力復構書院於明山之麓聚諸生爲之講解
今南京刑部侍郎周先生充之時以御史謫官沅之竹
寨驛公禮請爲師暇輒會講士多興起己卯更巡武昌
黃州會宸濠叛陷九江九江與黃蘄接壤倉卒備禦分

守者稱病不敢出城而公遽沿流入蘄蘄吏民方豕駭
欲竄公諭戒稍定日夜修城增堙募民集兵皆越宿而
辦黃梅有粟萬餘石與九江僅距一水衆謂魯虎牙間
而公從容取歸州城賊睥睨不敢犯境內按堵已而
旱出禱澍雨輒降未幾

武宗南巡供應賞犒之需籌畫周悉聲聞日益起然直
道不見容積勤六年而薦剡不一及及是巡按御史毛
汝厲先生疏公才節乃擢郴桂兵備副使強賊王廷鑑
爲患率民兵搗其窠窟悉殲之當道無知者其於事惟
自盡其心而不欲以聞於人類如此壬午冬于外艱明

年春會吏部考察旌天下賢能卓異者纔數人公復與
焉乙酉服闋補臨清兵備稽供應減夫役豪猾屏戢軍
民安之丁亥春擢山東按察使行之日耄倪泣送滿車
下八閩月擢右僉都御史巡撫順天永平整飭薊州邊
備見西北邊凋耗已極實將官培剋所致首議請甄別
將官賢否明賞罰以示勸戒仍劾去貪酷之尤者二人
邊境懼震戊子春畿內賊楊恭作亂驚動京師公調參
將郝通授之方畧不數日折其首京軍後至遂冒爲已
功公會弗之辯也凡防禦方畧鐵冶利弊與夫重守令
審均循清地畝會錢穀皆熟計而條陳之切中時宜有

撫畿奏稿三卷劬勩歲久致成消渴之症且念數十年
重大牢固之弊一旦盡革已爲憮壬所忌而貪官被黜
者相煽復起曰禍機在是懇疏乞休不允旣病卧知不
能起謂其子墀等曰吾他無所憾第汝祖墳塋未完祖
毋日疾未愈爲恨耳蓋吳安人久患目翳公求醫問藥
無虛日竟莫收效恒以爲痛云一日又曰我欲重脩家
禮今不能及汝等讀書循禮若不偶於時則自食其力
如徐穉子不矢爲賢曾無一言及家事十一月十九日
申時命墀等扶身正卧有頃而卒距生成化辛丑八月
初五日未時享年四十有九予與公成童而相聞弱冠

同舉於鄉始相識每別久復會夜語必達旦六合之外
太始之先無不極論有非他人所得而聞者至與他人
居或默然終日無一言與故新建伯王公伯安友語不
能盡同王欲屈致弟子列以自重其親知百方說之卒
不應其實學古心高才勁氣獨立而不懼知命而不惑
議論人物必求之心術之微舉天下鮮當其意者已或
有失雖纖微不自蔽人之柔佞疾之雖仇讎不爾痛也
所著有二書碎義書經存疑錄雜記敝篋留稿兀若干
卷藏于家配陳氏封安人憲副陳公輔先生兄女也子
男二長墀娶王氏都御史天宇先生之子次坦娶閩氏

刑部左侍郎靜中先生之子女四長適黃某光祿卿誠
甫先生之子餘在室未字卒前二日再上乞休疏上溫旨
諭留比計聞

賜諭祭塚等以卒之明年二月十六日自遵化行臺啓
攢至五月二十四日乃克抵家上嘉靖 年 月 日

塋 之原公卒二十有七日而予聞報於留都廢餐
而哭明日公友南京通政余子莘先生過予予告之哀
痛輒殞又再越月而靜中司寇以書來曰吾知汝成不
爲不深願與之周旋歲久目擊其履歷之詳莫如吾子
願爲銘而塚昆弟書復踵至銘曰

汲深兮量纒刺堅兮慮穎操百鍊兮駟項領人窘步
兮公獨騁獲古兮遺今盟鬼神兮于厥心世方驚兮
皎皎子獨力兮陰陰振衣兮高騫觀天地兮方圓周
流六極兮疇哉與言言意之外兮默悟者賢我懷雷
峰兮泣涕漣漣作此銘詩兮質于幽玄

明故文林郎齊東縣知縣致仕張公暨配郭氏

孺人墓誌銘

公姓張氏諱源字惟深別號介菴其先出漢留侯至宋
有仕於浙東官至朝奉大夫樂象山土俗饒朴因家焉
公會祖諱俊卿仕於勝國不大顯祖諱文亨慕郡城文

物之盛

國朝洪武間徙居鄞之月湖北第子孫遂爲鄞人考諱
錕兵縣典史號秋墅廡而有幹局妣楊氏出望族賢稱
里中公承家訓爲毛詩有名郡膠同時友如冢宰屠襄
惠公少宰碧川楊公司空楊康簡公提學憲副質夫楊
公方以文學負鄉望然莫不推公精確而兩浙士每臨
大比則相率就問戶常滿屢成化戊子領鄉薦尋入太
學四方之英俊及門領緒論無不解頤以退後往往致
位通顯而公竟弗獲一第人感惜之內午授知山東齊
東縣承積弊之餘爬抉綜理翕然就緒建社學修庠校

每聽事畢與生徒講業士爲振奮凡所甄賞必捷科第
視前蓋數倍焉黃鄭二教諭先後卒于官家屬甚無
以自遷咸爲之經紀歸其喪去醫藥具棺殮創漏澤園
揀災卹喪振窮周乏無不盡心爲之雖橋梁鋪舍纖細
備飭嘗遭水旱竭誠招弭無不響應故齊東士民有十
事異政之詠撫巡交章獎薦三載考績上吏部時三原
王公爲冢宰最慎許可稱公文學才幹考上上復任操
修益勵先是旁郡有達官家人以不法爲公所裁則畜
忿已而適爲山東按察官因鈎致公事公遽稱疾疏乞
致仕以歸是歲弘治丙辰年五十九耳出境士民遮道

攀留至或泣下家居幾三十年足不及公門惟日與屠
冢宰西峯劉太叅夢軒嚴副郎滄洲諸公談甚酌酒而
已公天性孝友親喪時雖方窮居而喪葬祭享百費悉
出已資不以干其昆弟至先人所遺則聽昆從取之而
未嘗居有一物諸子侍側惟庶慎是訓接人不問疎昵
一以和敬故未始有怨尤於人生正統元年二月廿三
日卒正德十五年六月七日年八十五孺人郭氏與公
齊德生後公一歲而壽至九十正月十八日十一月廿
二日其生卒日也卒之前旬日猶能紉針治女事人以
爲難子男四長格歷官南寧府通判援例侍養次林翰

粟授七品散官次朴建寧府城西驛永次植國子生出
爲公季上饒司訓濬之後林朴俱先公卒格娶嚴氏繼
陳氏林娶鄔氏朴娶沃氏女一適府學生范貴孫男三
煒煉燧孫女五公以嘉靖元年正月廿五日葬高橋東
北吳家岍秋墅公墓側越五年而孺人合葬十二月廿
四日也邦奇生晚猶獲交通判君嘗登堂瞻容色旣以
孰聞平生而憲副陳公公輔列狀尤詳謹述其大畧爲
之銘曰

明山東枕海邑鄞公孳秀淑人中麟浙闡捷戰登成
均匠生說詩衆色欣平生孝友敦彞倫爰施有政宜

厥民剗劓盤錯調酸辛陰崕百稿與以春牛刀小試
意弗伸解印未老知幾神二十七載離風塵著英日
萃滄瀛濱誰哉大耋勝組紉孺人康樂申蒼昊鬱林
游子孝且仁萬里瞻雲行乞身上堂雲錦華髮新捷
若嬰孺趨越越生前壽考百慶臻沒也餘祿歸後人

明故上海縣學教諭贈兵部職方司主事聞公

墓誌銘

公姓聞氏諱元奎字應明世居鄞西鄉之石馬塘祖可
信父諱璋皆有淳德隱弗耀毋楊氏公性誠直尤篤於
倫理事其親先後左右周旋懇至有疾憂形於色至親

滌穢罪堊毋旣遣奠日者云嫡嗣宜避公日焉有爲人子襄其親大事慮患者邪且不有天在吾奚庸恤後卒無恙處家嚴而能恕自奉儉薄而喪祭嫁娶以厚從事與人交敬而辨不輒取一毫於分之外自少業舉子稍長念父老以家務委仲弟今贈刑部主事諱元璧者而專心苦學及刑部公早世撫其諸孤均於已子雖間摠家事書冊未嘗去手夜誦率達旦在郡庠名益起志氣益勵謂必取科第展聲業爲親榮然屢舉弗售歎曰已矣遂自號無爲叟正德壬申應貢授常州江陰縣學訓導時刑部公之子淵已歷官吏部文選郎中南京通政

公子澤亦授兵部職方主事則屢遺之書誡之曰吾父子兄弟食祿於

朝惟無以報稱是懼當官立身古有明訓敬之哉越七年遷教諭于松江之上海前後所歷皆文獻地士破造就居多蓋其教先行實後文藝貌不違心言不踰行而矩度秩然人無不心服者辛巳春以職方秩滿將解官就封未果病作謂其子泮曰告而兄恪位著遺令名吾死何憾言訖遂瞑十月十七日也距生景泰庚午享年七十有二明年春始贈公如其子官階承德郎配姚氏贈安人先公 年卒葬光同鄉湖後山之原至是以

靖政元十二月十二日啓壙合葬子男三長卽澤次洋
次法早卒女三皆有歸孫男五某孫女二始通政君之
冠也賓字之曰定夫與職方君俱入郡校公日課誨期
以遠到一夕夢神人授已進士登科錄啓視則二子姓
名字行之屬具在神且言曰淵字定夫未盡也其更曰
靜中澤曰美中公寤從之已而果相繼擢甲科歷顯要
器藝功業蔚爲時望其他子姓復彬彬繼起蓋公席累
世之德光前啓後之心又專而不懈精神所注至於冥
孚而幽格以致有今日愈盛而不可量者豈一朝夕之
故也邦音與公同鄉而生後然與通政君同朝日久雅

相愛凡公訓育之恩績學勤家之狀每爲予昕夕言之
適今考績之京得便道哭公于家間謂予曰伯父平生
惟子聞之謦矣銘其可辭邦竒謝不敏弗許而職方君
繼以狀請乃爲之銘銘曰

維小江湖之西錫山巍巍有藝其中弗華以滋豈其
弗滋懋發者遲其速其遲匪我能知力漑而培曰予
職之不虧而卒副其所期斯無爲叟之爲乎

明故司馬夫福建布政司右叅議裘公墓誌

銘

公姓裘氏諱壤字本厚世居慈溪之西嶼鄉姚江在西

因號西江曾祖諱汶玘祖諱謙皆隱弗仕父諱鏗積善累德人號毅詒生以公貴贈奉直大夫工部員外郎毋梁氏封太宜人公自幼穎脫讀書善尋繹理致爲時文秀酒冲淡而綽有餘味充邑庠生弘治己酉領鄉薦以丑登進士第授行人司行人嘗奉

命出祭宗藩寅恭有儀爲王所禮敬節餽幣物悉辭弗受歷官七年頗以鯁直爲時所忌壬戌陞工部虞衡司員外郎督理五城九門街渠垣墉及二十四衛軍器京人烟輳集豪右之家侵塞溝渠恒患流潦公日巡視疏濬有方嚴革豪右之弊雖自是暴雨不能爲患飭衛

所肄軍容精器械政法翼然無敢怠玩癸亥差權稅荆
州蠲繁稅明號令杜請托絕貴勢之強估清猾胥之陰
蠹商人大悅川至雲集常課之外復有羨餘則儲以待
繼者曰使後得寬一分於民即國家受一分之利也未
幾遷郎中比竣事便道歸省屬穀遺公嬰疾夙夜待湯
藥不懈既卒月餘適

朝廷上

兩宮徽號覃恩庶僚始膺誥贈公以祿不及養生不及
封益號慟不自制戊辰服闋改禮部主客司時逆瑾弄
柄少有詿誤輒被重譴而殊方異種接遇尤難公裁割

明決庭無留事泗夷賓貢送逆館餽疏數登降動適情
即已已陸福建布政司叅議總理糧儲見倉困空虛軍
士或數年不受粒米庶其故在糧長私歲賦有司受賂
不問乃糾貪懦懲奸猾擇謹慎吏董其事而躬親照刷
賞罰必信復檄郡縣糴穀入便民倉經畫周密不苟爲
旦夕計上杭流賊攻陷縣治聲搖數郡公職兼分守召
兵募民截守要害設法擒其渠魁諭撫餘黨悉歸之農
數月奔太宜人喪太宜人予大母姨也大父東臯先生
博辯矜嚴少許可然公少時輒見器重延之家塾訓迪
子姓故吾宗之業舉子擢進士率公實啓之吾父太史

公於公尤厚以吾妹妻公之介子穆邦奇束髮偕計公館予京邸見公事太宜人朝夕無違志每爲致珍饈數十里外暨予南歸公念穀遺公違遯日久南望悵然墮涕如雨蓋篤孝如此宅憂致哀殮塋致厚享祀致思無或悔于心焉其弟垣壑墳咸有恩意分餘祿爲給產業處家方嚴不語鬼恠不悅邪術家人膏疾病或暮夜引巫覡爲禮禳公聞之怒滅燭毀具巫懼走匿竟莫爲祟性亢急不能作卑陳態人有過或面折之至親故急難憂形于色救之恐後素不飲酒然客至必致洗腆笑語訥訥雖累日夜無倦色禮儀必肅衣服必潔官居必

治器物必飭花卉必方列自謝政深居簡出課子之餘
翠竹蒼松泮渙優游十餘年瀟然無塵俗累一日疾革
呼諸子謂曰死生命也爾曹檢身飭行無貽父母羞言
訖而逝正德十六年辛巳二月二十五日也距生景泰
五年癸酉十二月二十七日享年六十有九明年 月

日塋所居南先塋之次其子穆述公行實偕昆弟謀
於邦奇曰先君塋有日惟是平生所知厚無如都憲姚
公廣東參議周公者周公已卽世而姚公方鎮鎮北門
述弗及請銘吾子之知先君不爲不深敢請邦奇不敏
然辱公愛最久且篤義不得辭謹爲序及銘公配趙氏

封宜人子男三長程娶毛氏繼娶張氏次穆邑庠生子
妹婿次科娶任氏女四長適陳烝次適周士賚卽參議
公子也次適周大志次許適鄭孫男四字宗宣宏孫
女三銘曰

公昔振袂登朝廊風標秀酒氣激昂媿嫻恣意弗
減長趨廣步來康莊南到甌粵西荆湘澄心不愧臨
滄浪舜江潮汐鳴瓊琅上有松桂森成行生兮優游
死兮藏風月千秋西嶼蒼

明故贈南京兵部武庫清吏司主事張公旣配
安人顧氏墓誌銘

張氏自宋季居上海黃龍浦之東其後諱益者徙縣治
右聲嘉洪之南往來臨淄青齊間能恢張其世產生本
醇德弗耀本生公公諱鯨字文升別號簡軒生三歲母
郁卽世祖母朱鞠之公早慧十歲能屬文十八以儒士
就試由縣而府而憲院皆首擢已而十試鄉闈曾不一
偶人以爲命云養其父食必請所欲致洗腆以進少拂
意卽跪以謝疾革滌穢刮垢躬執無難色居喪致毀家
人或懼其傷生微諫之叱曰卽吾以哭父死而寧憾耶
何故欲重吾惡逆也伯兄鮪治別墅海堧去家幾二舍
許率旬月一歸公每先期治供具至則笑語款洽迨斑

白不渝其初兄以其二子鵬鶴稟學於公鵬爲邑庠生
鶴領壬午鄉薦皆克鳴其才焉家僮嘗入市遇負貸者
以綿買錢盡取之以歸其人訴於公曰負債當還但吾
舉家待此錢以食不則爲溝中瘠矣公亟命還之而咎
其僮或曰僮亦爲其主耳柰何咎之公曰以吾所甚輕
而奪人所甚急沿是將稔惡以禍我柰何弗咎毋自語
曰欺人欺心也欺心欺天也天理亡如爲人何故常推
誠待人不肯自擇便利溫良謹恪爲鄉邦所愛重博學
善爲歌詩歲丙寅有司修

孝廟實錄特禮請公公少出贅顧氏嘗有盜竊其奩資

以去顧翁惜之償以腴田及牛公辭曰命則弗有而徒重費婦翁何爲卽治裝告歸奩具外不持一緡凡公意所欲爲厥配顧安人克贊襄之每見公苦學恐以家事分其心率婢子躬紡績服食宿祭往往不經公意而辨事舅姑有禮教諸子有法年三十撤粉黛屏華飾衣服雖垢敝不輒廢器械不再濯不用相閣庖湑必致淨嚴內外僕御必勤飭勵顧上海冠族而顧翁璵尚義有家法安人蓋習於家教云公生天順己卯九月二十有九日卒正德戊辰四月十有八日安人先公二十日以重九日生其卒先公十年爲弘治戊午四月朔日也嘉靖

戊子明倫禮成

天子覃恩天下時公以介子鵠爲南京兵部武庫清吏司主事贈階承德郎官如鵠配贈安人長子鵠屢舉未第娶王氏鵠娶陳氏繼許氏孫男四操揖元擴元揚鵠等以公卒之明年己巳正月三日舉安人合葬肇溪之南而未有銘公從子故刑部主事鷗與予同年進士而鵠之舉會試也又與予族父儀制郎中惟靜先生同年鵠以鷗意奉南京太常博士謝君表所爲狀乞予銘予方奉

命校二十史久未遑作族父又屢速之乃爲銘曰

稽田既良陳修孔臧我澤既霽言厚其防有媿我德
佐我孔力于養于薦夙夜無斁既稼既實既豐既碩
匪躬是穫繫後人是食

明故贈承德郎南京應天府通判半溪聶君墓
誌銘

嘉靖戊子

皇上追尊

獻皇帝覃恩兩京於是半溪聶君以其子淳貴贈承德
郎南京應天府通判君至是歿三十有八年矣又三年
淳以京兆政成遷同知衡州府事將行奉其鄉友給事

中丘時峻所爲狀請銘於予淳少孤比長力學志靈一
命爲前人榮故久虛墓石以俟而竟獲副所期也則淳
之賢孝可知而其來亦有自矣乃叙而銘之按狀君諱
衡字能銓宗溪其別號先世居清江至宋徙新淦之府
溪曾祖子文祖功懋父順文世隱其德母周氏君生而
早慧五歲能應聲作偶語九歲能近體詩父嘗被讎誣
構陷大辟君候監司至伏訴道側監司命楮列以進遂
得父寃狀釋之君時年十有三耳弱冠善爲文陳憲副
某見之曰此聶家千里駒也後以多疾棄舉子業適情
於農圃醫卜山經諸家而質之經傳卒能以詩辭鳴女

第將適廬君爲之治奩豐甚父意不懌君曰大人所以
貽不肖者視吾妹尚不啻也卒與之父性嚴厲鄉人有
犯不少假貸君每曲諫至受箠不置客至致極洗腆
考妣忌日悲泣不御酒肉先壠必躬省芟薙培植無或
失時舅氏貧且瞽事之如母卒爲殯葬內弟二極意誨
育長復室之俾有成立父先令家僮數輩理醴吳越間
君歲一較勘至是遣一內弟共事使取羸焉內弟感泣
公亦泣成化乙巳山漲暴作鄉閭無備有龜蛙之厄君
時爲萬石長令撤扉結筏運所歛官儲給之皆賴以全
活已而官督日急則捐貲倍糴以輸鄉人感頌惠政橋

北縣募民修復費修莫應君出重貲以倡遂用底績里
中有惑於後妻者欲誣殺其子君解之力不省甚使隣
人毆其父父急大呼其子奮怒直前由是感悟嘗客于
松有同旅者暴卒其貲未有識君并其籍封之而自以
索金爲營其喪居數日其子持左券來感服而去鄉族
或匱于養或不給于昏喪散金帛捐器賄給槨殯不少
靳而未嘗責報有訟曲爲之處各服其心每以睦姻爲
勸鄉俗多感化者念宗族世遠譜亡意圖修復會以疾
卒于松弘治辛亥二月甲子也距生正統己巳四月二
十七日年四十有二時諸孤尚幼醜縉在浙有欲染指

者竟賴內弟極力完歸亦克嫻之報云配楊氏贈安人
子男四長天海娶裴氏繼魏氏淵娶陳氏淳娶曾氏三
女俱殤孫男六人一楷庠生娶盧氏桐娶王氏維植庠
生聘蕭氏楠聘劉氏森梁尚幼孫女七
年 月
日墓里之革頭園銘曰

維君之志不有其位厥澤旣霑維君之賢不克末年
亦盛以傳旣篤于親施于媀隣腴瘠亨屯是曰種德
視世攸殖孰爲失得革園之里有封巋止垂四十祀
乃被

龍光爰有銘章以誌厥藏京兆匪緩厥志維遠孝思卒

展展維孝思維教之誥百世是宜

明故都指揮使華君室闕氏孺人墓誌銘

浙江都指揮使華君之卒也今南京吏部尚書致仕朱公銘其墓稱君尚義好施望於江南自武功伯徐公冢宰王文肅公鈞陽馬公輩咸推重之朱公忠亮簡賢不輕許可而於都閫君致譽若此宜必有徵矣後十餘年予讀君之從子兵部郎中鎰所爲闕孺人狀則知君平生行義得於中贊君多焉華族之日振弗衰厥亦有自闕君長洲之五滙涇都閫君闕甥也父南湖府君爲之擇婦于外氏聞孟威處士者有賢女母亦華也欣然曰

是足以世吾嬾矣乃文定焉旣歸華氏三世共爨家爨
千餘而孺人以冢婦夙夜力勤撫接內外崇卑踈戚罔
不宜家旣恢裕惟子姓之驕侈臧獲之惰肆是懼節量
禁抑皆有法身先寡約服習飲飼澹如也都閩君自少
痛遠聲色平居相對如賓教子孫甚嚴而孺人以慈濟
之况嘗總區賦負官租家以是落念孟威卒請曰君子
嘗聞吾舅姑擇婦之初耶於是舉其三喪還其債田周
卹其孤婚嫁其未立鄉邦益以是多君然皆孺人之成
之也嘉靖甲申季子錫以國子生授鄧川州吏且至卽
捐俸新孔廟平吏訟裁疆禦聞之怡然曰官何必問崇

畢苟自立即華氏爲有人矣嘗病脾至是增劇弗起嘉
靖丙戌九月四日也距生景泰庚午九月三日享年七
十有上都閫君諱塾字允明世望無錫嘗附應

詔輸粟助邊累階浙江

相揮使先十有四年卒子男

三長鍊國子生先卒娶錢氏繼徐氏次均義官以詩鳴
娶鄒氏次卽錫娶錢氏女二適鄒元吉鄒庶國子生孫
男四沂國子生娶夏氏汶國子生瀛洛娶俱錢氏孫女
三適蔡元進莫士奎一尚幼曾孫男六啓孫未孫壽孫
繩孫虎孫紹孫曾孫女三卒之六年辛卯三月錡卒無
子錫乃卜以是年之十月七日奉孺人柩於西壽山之

原啓都閩君珉而合焉附尤錡于珉次謂其子汝嘗卒業子門令以狀乞銘銘曰

處豐以約維識之卓御衆無愆繫心罔偏嗟昔南湖志世厥姻天鰲女士以報其仁孝哉都閩善繼人志匪優內黨寔隆外氏金緋甘載于林于泉克諧終始孺人之賢峩峩湖橋有新堂構維子孫曾樂此慈壽西壽之原蠶彼佳城潛德弗湮太史有銘

明故朴菴王翁墓誌銘

翁姓王氏諱謹字用懷朴菴其號自曾祖榮以上居中吳之長洲以賢雄其鄉洪武中榮以富戶徙實京師乃

構室秦淮之濱占籍上元縣祖諱祥考諱賢母周氏翁
惇質嗜古讀書履善卷生喪死致其敬哀事庶母朱復
孝謹朱生弟璿及妹妹婿孫華人贅其家皆友愛之因
其心於孫氏諸甥與其子無異視親隣弗給者捐其貲
濟之或爲之置第宅以居雖甚費無靳色不惟不希報
且飲其德不言吳人鍾姓者徙宅遺金翁見之遽追以
畀之應

詔輸粟授散官然性不嗜綺麗居常出入率衣素布泊
如也嘗會飲隣人間忽出聲妓妓攬袂進觴翁拂衣出
比歸遂斷其袂若浼焉者其嚴如此娶何氏生輔娶姚

氏女三長適景賢次適顧裕次贅韓宗祺女卒爲妻張氏繼之置產別居焉孫男一孫女一曾孫女一出生正統丙寅十一月十有六日卒嘉靖庚寅十月十有九日壽八十有五十卒之明年十月二十有二日塋鳳栖鄉祖塋之次先期輔介其親友葉生桓奉狀來乞銘予誥之及替乃克成銘曰

相彼木矣華維朴矣維朴以華其輝孔嘉翁篤於仁孝友睦姻積而能散罔私厥身有燁服章日以彰義公會弗華維德之貴年躋耄耄式固以敦宜爾昌隆爰及子孫

故妻孺人王氏墓誌銘

孺人王氏諱淑貞父曰松浦先生與吾父翰林檢討洞雲公友善予甫四齡輒納采於王二十莫鴈焉明年予入太學又明年登第奉

詔入翰林讀中秘書又明年孺人來京師朝夕敬戒以義規勸所以助益予甚多性好脩潔不苟爲靡費奩櫝必飭針縷絲枲必謹收貯裁製纂組號精女紅者不能及柔訥貞慎雖女价往來必請所以爲辭命一錢尺帛不問不輒用人有餽遺必問其可否於義氣稟素對嘗病嘔每作輒幾殆乃甦自是日羸困屢妊弗育年未三

十輒謂予鮮兄弟宜蚤爲後圖予不可則朝夕言不置
命隣媪訪求其人躬爲往視卒納焉其平生所專爲必
斷自遂雖痛抑弗爲止者纔此一事而已生女二愛踰
已出予居翰林十有一年念父母日益老莫爲侍奉時
朝政紛更迎弗果來不得已上疏乞便地以正德乙亥
出官湖南迎二親于官舍旦夕承事畧能勉順吾意越
五年寧藩煽變

毅皇南巡四方日擾擾多事家君意弗安將東歸孺人
曰吾屬安居顧使老舅姑冒洪濤去邪予善其言遂奉
親以行上章言所以不可仕狀比再越歲始得請仲尼

有言啜菽飲水盡其歡蓋將以是終身焉矣迺嘉靖癸未春蒙

朝廷誤恩起官西蜀竊念西蜀去家萬里稱險絕於天下將毋不得音問難通低徊間適裴氏妹復死具疏將再辭而親友不可乃不敢寧居以七月二日啓行行百餘日抵蜀越二十有二日孺人病病九日革言曰死生常也使在家亦已矣予解之曰婦人以夫爲家卽夫在何地非家曰固然念重爲君苦耳蓋不以身之死亡爲憂而惟其夫之苦楚是慮悲夫悲夫生成化壬寅六月八日卒嘉靖癸未十一月十四日年四十有二其始歸

予則年升有二也相從仕路二十年身無金壁之飾受封十有四年不能具冠帔如

恩數蓋予之拙畧無能爲而孺人亦恬焉居之顧其心所最願惟子嗣是急蓋真可以冥裕幽孚而予之不德亦竟莫稱其意以死嗚呼惜哉以明年十月八日啓攢歸十二月二十七日殯于家又明年正月八日祔塋祖塋之次銘曰

二十而迎汝四十而送汝嗟百年幾相距返玄廬爰得所尚其有待終焉偕處

故裘氏妹墓誌銘

吾妹素質孝父母所鍾愛年十七歸于裴子時始入翰林聞之泣下蓋不意遽行且念侍奉者之希也已而吾兄暨徐氏妹復不幸相繼死子乃辭館職乞便地數年竟解官歸無非爲侍奉計而父母且日益老今者蒙誤恩起官西蜀將十日就數千里道所賴獨裴氏妹在而又至此極吾復何以爲情耶天乎悲哉妹諱仲安壻曰裴君景文名穆慈溪縣學生有文行福建布政司叅議西江公子也公於吾父翰林檢討洞雲公爲姨兄雅相厚吾張氏居鄞西之槎湖裴氏居慈溪西嶼鄉俱舊族地又相近故世爲姻焉妹生而聰慧靜默未嘗習女

工端坐終日雖撓之弗爲止比有家承上逮下善識人意柔順貞則毫髮不苟居常恐育鞠刻意勤儉事必先備却顧綜理裁酌動適人意與之論道理舉首知尾往往默契與訓超然言意之外迺嘉靖癸未夏閏四月吾母封孺人沈氏以邦奇將赴蜀遣隣姬迎妹妹乃留姬躬與澣衣理篋笥將歸寧忽一夕病作五越日遂死是月十有七日也距生弘治己酉正月十日年三十有五病且革命侍女抱扶起坐遺言以不及一見父母相成夫子之志業爲恨蓋至死不少亂子若女屢產弗育遺女一人僅十越月妾氏生子一人僅八越月女以遺

言就育於吾母暨吾嫂林氏景文哀甚幾墮將以

日葬于所居南先塋之側予自念不肖而生妹賢而
死其悲慟不自禁豈祇以手足骨肉之情哉然嘗讀班
婕妤賦自以性命淑靈爲祖考遺德而身之蹇舛弗與
焉若吾妹其亦可以自慰矣夫銘曰

生獲其配死靡攸悔短長曷計

故處士西墅梁公墓誌銘

維梁氏與予張氏世爲通家居又相密邇邦奇自幼見
西墅公時時往來槎湖之上儼巾服秩儀度情淡而真
言簡而中或時登堂拜公觴豆森列設饌洗腆禮意周

洽移時乃罷蓋梁固鄞舊族而公又善承其先人故雖處清約能不失故家風味褒然爲一鄉望焉而公今逝矣悲夫公諱衍字文博宋工部尚書廿二大夫之後十二世至存軒先生諱叔義自槎湖徙居宅西之別墅故公以西墅自號存軒長子諱道坦字元履世稱履齋先生爲詩文幽邃古雅遺稿尚存實公之高祖也

厚祖諱景俱有行誼考諱朝字慎斯世稱西疇先生懿學淳德楷模於鄉母戴氏以賢淑稱公自幼警慧強記善楷書成化改元選寫

英廟實錄事竣郡守莆田方公才之令充縣史精敏勤

幹爲上所愛重幾二考乃厭趨事功謝歸田里濟畝澮
課農圃清庭宇備器物用娛養其二親西疇先生得以
時致賓朋恣情觴詠超然不問有無而隨取輒足蓋藉
公之力居多焉御子姓宗屬嚴且有法常以讀書習禮
毋墜先志爲訓喪祭嫁娶豐儉中適雖負性英特不屑
苟同間與物少忤然未嘗宿怒故亦無甚怨之者旣謝
事優游太平之世蒼顏白髮老而愈康歲時慶賀冠履
駢集若吾表伯少參表公吾父太史封君叔父萊鄉大
尹於公皆甥也執爵獻壽青紫輝映人謂公世累所致
云正德己卯八月十四日戌時以疾卒距生正統甲子

閏七月初一日 時得壽七十有六配薊城彭氏繼吳氏子男二人長鳳彭出既娶而夭次鸞吳出女三人長適陳達次適慈谿裘 皆彭出次適儒士周弘吳出孫男四人有恒業舉子有孚有素有采曾孫女一人鸞謀以嘉靖八年 月 日葬章橋東祖塋之右奉其族兄竹村先生寅所爲狀屬邦奇銘銘曰

老成儀表舊族衣冠百年清世優游考槃罍脰之涯原隰漫漫履綦不見憂心團團

明故廣西布政司右布政致仕楊公墓誌銘

嘉靖乙酉六月二十三日廣西右布政使西川楊公卒

距其生正統丁卯閏四月一日春秋七十有九其子茂
端卜十一月十七日葬西川之原奉其親女吳克明先
生所爲狀請銘於予惟楊氏鏡川舊族自公從兄禮部
尚書文懿公之興伯仲子姓文行功業蟬聯輝映爲海內
所歆慕矧予通家後進辱公啓掖又久且深雖不敏銘
其敢辭按狀公諱守隅字維德祖考栖雲先生諱九疇
學行懋著以孫守趾貴贈通議大夫南京兵部右侍郎
祖妣朱氏贈淑人考諱自恣才性英達自號菴菴公之
貴累贈兵部職方司員外郎妣陳氏封太安人贈太宜
人公以成化庚寅克郡庠生丁酉領鄉薦己亥丁外艱

甲辰舉進士丁未授工部營繕司主事庚戌改兵部車
駕司尋陞職方司員外郎丙辰陞署郎中以太安人高
年思念成疾乞歸終養次徐州聞喪奔還服闋授車駕
郎中甲子陞江西左叅政己巳擬雲南右布政使有
旨令致仕庚午復官陞西叅政壬申陞廣西右布政中
途謝政以歸公幼穎敏年十四文懿公爲翰林編修
召如京因稟學焉居南雍爲祭酒思軒王公所器許比
官營繕革奸弊裁冗費能稱日起時

孝廟陟阼紀元

郊祀耕籍田事方叢沓而應以整暇先期中官有奉

命葺

具服殿者賈司空已爲之期旣而忘之中官出怒甚將入啓焉賈莫知所爲獨趨公往至則中官誚讓不已公從容數言辭之因相與協成其事盖公爽識不滯而和平欵愿善於諧物成務類如此在職方專理軍伍時軍人入役率顧妻爲脫亡計公緝按十餘家一時懼服吳駕部首言馬政之壞由兩司之待兩寺猶所屬事多制于肘而人不樂爲宜簡兩司素著風力者蒞其事且得錄子顯親視在京三品例則人思效用而壞者可復詔從之盖迄今以爲例中官執片猪撥馬快船動十餘

艘公請以勘合入

內省必需此以行由是權倖不平然偵伺百端無所得
叅政江西其時更代不常庶務丘累署司事僅越月滯
牘爲空寧藩祿米例石銀一兩寢溢其半比公當徵收
啓曰今江右災傷極矣爲國恤民獨應與諸司異耶寧
藩屈服令收折如例臨江盜橫累歲每遣兵勦捕不敢
命官恐爲所得彰債事之咎公曰安有衆無統領事克
有濟乎聞縣丞劉伯儵者有智能指授之以遣數日置
酒召僚友曰將以待捷也人以爲戲酒甫行而賊平報
至守九江道適榮王之國沿途貢用之物前驅者輒攘

以去公令先具惡草聽其所取而後珍貴貢焉故費省而民不煩行部陝西經涉歲時不少休暇流氓肆掠蜀漢騷動公嚴爲之防關中賴焉前後五六年間多著勞績當道剝薦無虛歲事有所疑恒必咨之然安於義命不能與時競逐故銓司推任方伯至于再三竟弗果其得致仕之命且被譴謫罰粟至四百石則以執法辨誣忤逆瑾意其復官也在逆瑾誅後而乞骸之疏至再而益懇也則當夫任用方殷之日平生所樹立從違進退卓犖蓋如此家居與從兄工部尚書康簡公南京吏部尚書碧川公往來觴詠無間寒暑歲時賓介之席伯仲

遞延以居鄉人恒侈言之比二公之逝也城府遂屏迹焉爲詩文渾厚方正有默菴西川手稿若干卷藏于家默菴公初號也配張氏都憲公諱楷之孫女有懿行知孝經小學大義諸子女能口授之累贈宜人繼厲氏中贊有方封安人贈宜人繼何氏未久而逝子男二長茂信克郡庠生早世次茂端善承公志俱張出女二長茂尊適金潛亦張出次茂葆字周苞側室出孫男三美璋美瓏美玖孫女二曾孫男二承曾承爵公既師承文懿又與康簡碧川伯兄豐城訓導顧菴先生及從子刑部侍郎茂元按察使茂仁仕皆同朝相勗以義相觀以善

咸永終譽盛莫與京今南京前府經歷茂恕鴻臚署丞
茂清從孫廣西知府美璜咸恪位著鄉進士美冕恂謹
博洽有祖父風蓋公所啓迪多矣銘曰

孰廉而不劌孰安舒而有制孰貞固而處之以易維
深閱斯大器彼躁而曉徒憤盤公默無聲事允濟飭
予車撰予轡隨險夷明進退循此家規以貽來世

梁孺人章氏墓誌銘

孺人姓章氏諱德清父鎮以行義聞孺人聰慧婉婉母
趙氏嘗病瘋齋素告天求以身代三年病愈乃已嫁梁
氏爲東山公嶽之配時東山家落諸昆季不相聊孺人

張文定公靡悔軒集卷之十

墓誌銘 四首

明故封恭人萬母王氏墓誌銘

天將生非常之才爲當世用必有淑範令德鍾美發祥
焉而其巖明幹固又足以衛孤危而植顛隄是故不出
閭閻而

邦家賴之古之所謂女丈夫者非耶則惡可以弗銘封
恭人王氏方孩提輒慧順不倫母姜峰陳氏早寡無子
極鍾愛常兒子畜之而恭人莊靖英疑已居然女士風
度云稍長授之孝經論語內則輒了大義教之女事謹

且工委之會稽若素開駟驗者年十八歸慎菴萬公公
時沉意學業父蘭窓公服官政莫問事產司幹當者日
肆蠹蠹家遂弗支恭人捐奩資佐百費償宿逋伍百餘
金而勤約節量歲時合父母所遣給絲累籽息漸致充
裕蘭窓好讀書或至夜分家貧膏或不繼蘭窓弗憚也
恭人常豫儲以待歲侵艱食躬茹惡草猶時至缺乏而
舅姑之側有兼膳王舅竹窩公暨姑之父都憲張公咸
有遺婢依于姑恭人推舅姑之愛愛之沒身不衰比舅
姑沒喪葬之禮惟慎菴公所需極力副之罔所遺憾親
族貧者餽橐不絕死則助棺衾焉生子一人曰表素

羸疾意常憐之及慎菴公遣就學則相厥義方靡或姑
息歲甲戌慎菴公卽世表當襲官年甫踰童恭人乃挾
之北行表道病且劇則籲天求以身贖且曰卽不憊吾
其赴水殉矣表旣服官猶勸令卒業誠之曰予歸萬門
聞武弁不學之患舊矣棄信義茂禮法轉相阱石以爲
已地政使得志吾不願汝曹效之况坐是失職者相尋
邪表或弗懌於外入以告則又誠曰夫天地廣矣鼠闕
於穴疇遑問勝負爲也庚辰表以弱冠中武舉乃由寧
波衛指揮僉事陞浙江署都指揮僉事董漕政漕舟皆
先期集能聲籍甚尋掌都指揮使司印兀俸賜所入恭

人命別籍掌之日遂佐汝庶有餽遺必訊所從退食必
詢所事事已而轉督京營會疾作以恭人意告歸恭人
居歲餘嘉靖癸巳三月七日卒距生成化辛卯六月二
十日年六十三十月二十六日表奉柩權厝于錢塘西
溪安樂山之堂卜嘉靖乙未月日合葬于慎菴公
之墓恭人諱汝王生鄞東萬齡鄉初宋荆公安石宰鄞
弟安基出贅童氏傳九葉承事郎諱仁者恭人父也女
潤秀適張芳毓秀適毛瓊皆庠生表娶方氏山東參議
東原公孫女孫男來章孫女如璋偕璋恭人御家嚴正
媵婢臧獲咸有約法慎菴公沒垂二十年庭闈肅如也

而其均勞逸秩敬勸但使人悅服無間言性本泊素又
寃信佛教以慈悲不殺爲念自祭祀宰割外賓客所須
惟取之市而已援溺拯難搆橋梁治衢道雖費無所靳
出謀興事前却顧慮以圖永久晚歲修遺令曰吾聞始
祖謙一府君墓滁州麻塘湖之原識以宰木盍往求諸
旣得命勒石置守每三歲一往致祭在鄞西山及杭西
溪諸墓二歲一致祭以其雲龍磳田百畝世供籩正又
曰吾家初遭踣阨皆我母氏卹惠周厚相我有植不爾
其何能家且我母育我以子而吾無益於其無後柰何
其以吾墓右隙地立祠祠我父母祭之如祭奠之期並

立成規載之金石子孫永永無鞮疾革又曰即不諱其
以吾績置田二十畝之稅及諸衣物悉廣施予且此易
置物耳以殖陰德遺子孫庸有匱邪言已尋屬續沒未
替北園弗靖漕河多故

上迺陞表漕運叅將舉朝咸謂得人然叅將文明勇略
無施不宜其爲世用有未可涯者萬氏在

國初死王事者四世至慎菴公復早逝其時單弱特甚
備見凌侮勢誠岌岌而恭人以一身覆翼之茹百辛嬰
萬變始克立厥子以恢昌厥家嗚呼難哉予雅知叅將
君其子來璋予壻也迺者哀隕之餘手狀行實屬其兄

壻張君芳徵銘於予予撫其大者序之而系以銘銘曰
萬祀

帝鄉緝服東浙

王事靡盬世顯忠烈曹陳及吳咸抱玉雪慄慄抵危三孀
一節世德懿絕外內媿美天將昌之載釐女士於
休恭人克虔紹啓夕惕晨兢服䟽茹菲尊鯁豆邊脯
羞芻豢以悅姑嫜以嚴賓祀翼翼其綱秩秩其紀本
之仁慈慮以終始錫胤自天英睿奮起宣力出謀以
佐

皇理正慎菴公期子進士公既蚤世表以武舉允武允

文益光先緒時維恭人扶傾植圯卒觀厥成堊裕無
涖西溪之原九沙縈止不有顯光以永休祉

旌表節婦謝大母周氏墓誌銘

節婦周氏諱應祿鄞舊族也考諱富母陶氏節婦自少
明淑通孝經女誡諸書志意不凡不與時俗競綺麗年
北二歸杏菴謝公時惟舅養素公在事之虔甚杏菴挾
岐黃術客游會稽不幸物故節婦聞訃頓絕移時方蘇
曰得無傷老舅心乎自是飲其哀不敢過慟時年甫二
十六生子表纔三齡爾卽解簪珥倩人之會稽返喪以
力弗逮隨鄉俗火化以骸骨歸節婦痛恨頻絕權瘞光

同鄉諸家橋先塋之畔輒豫穿已穴耐焉明年養素公疾革謂曰我子雖早死媳婦克孝養以終我天年吾死何憾善自保愛爾必有報於後語畢而逝節婦哀動隣族殯葬如禮或諷令自便輒以死誓子幼得嗥疾疋羸日甚朝夕於祠堂下焚香稽首祝曰天不絕於謝氏當使吾兒獲全如是堵再歷寒暑忽一夕夢有神人語之曰若兒明年上元病當脫去至期一汗而愈體轉肥碩家資奩具皆空惟祖遺衣服書籍謹歲不失人問其故則曰餘物猶可復置衣書氣澤存焉柰何棄之歲時忌日必躬具醴饌祭舅若夫未嘗不泣涕交下旣罷不食

終日撫諸孫極慈愛然少弗率輒厲聲禁之孝經等書皆自口授正德甲戌長孫汝儀舉進士喟然曰方汝祖背棄見汝父成人足矣不圖今日復見汝膺立也吾即死無憾矣明年壽七十有五守志既五十年縣令蔣福陵以狀聞

上命有司旌表門閭未幾子死極哀痛而恒以禮禁飭諸孫不許過哀傷生汝儀知餘于縣嘗迎養比服闋陞江西道監察御史巡按廣西便道歸省諭之曰美官難得好人難爲汝尚勉之逾年陞廣東按察僉事復迎養焉然自念高年有鄉井之恩會曾孫于之天亡歸心愈

切適有改調福建之

命侍奉東歸將之官懇請就養弗許既入閩念其祖母
不置上疏乞終養格弗得尋轉本省海道副使乘間移
文當道棄官而歸又上疏不允節婦以大義責之行而
汝儀有難色乃申飭之曰而贈而父監察御史封而母
太孺人矣乃獨不念而祖及祖母乎何爲空犯嚴例重
貽我憂汝儀不得已乃留家屬侍養單騎赴閩及轉雲
南左叅政止携其季弟以行壬辰秋轉江西按察使聞
報卽行取道歸省節婦先已得疾伏枕呻吟念二孫在
外諄諄如夢中語癸巳正月三日二孫抵家欣然若病

去體飲食言咲如常時旬餘病忽增劇遂弗起正月十
有六日未時也距生正統壬戌五月二十有六日辰時
壽九十有二春秋既高於內外屬爲高曾行而卹幼字
微久而益篤故親疎懷附無有惡斲撫子婦張太孺人
暨諸孫婦慈誨並至家無間言性勤紡織自屬績前四
月蘇泉猶在手云杏菴公諱瓚性亢爽明醫道傳自河
南盧氏異人數起危疾急於救人不責其報求者朝夕
門湧如市而不幸早世憲使君將以其祖母卒之年十
二月二十八日丙申奉其祖遺骸具棺衾合塋于先塋
之南較節婦所自營稍前數武櫛舊以甃甃今易以石

云孫男三長卽汝儀娶汪氏贈孺人繼娶范氏封孺人
次汝誠府學生娶趙氏季汝立業舉子娶徐氏孫女三
汝婉汝婉汝敬壻曰董梧沈雱朱統曾孫男六千之守
之俱天復之上之豫之大之曾孫女五靜之宜之正之
福之安之始香菴公與節婦間居談及曹令女事因曰
令女金石爲心流芳千古汝能爲乎節婦應聲曰彼亦
人耳何爲不能公首賞久之然自公卽世幾七十年于
茲不惟完節皦如克成其信而孝慈天至綏承後先且
親見其孫敷歷中外躋位三品德業名績日隆未艾夫
純嘏以疇純德天之道于是乎著是固宜銘而憲使君

手狀行實服衰杖桐踵予門以請予何敢辭銘曰
天方降阨攻焚踏擊如不我克秉厥貞嘉之苑靡他
如王弗瑕維此純德神明是格佑我孔力

帝命旌門植扶乾坤柔立薄敦鼎釜是願優游耄期孫
曾咸熙孝孫雍雍萬里來同視我考終慈孝感應顯
允天性是臻百慶杏菴高義夙懷遠志而不永世節
婦克承子孫于繩大振厥聲光同之阡節孝繫焉於
昭萬年

明故月溪處士施翁墓誌銘

予昔接施翁穆溪之墅默然如不能言退然若無所爲

者升其堂儼乎有序肆几筵旅敬核郁乎有儀子孫僕
御秩秩乎敬且習予同年蕭子若愚守嘉興論郡中耆
碩舉翁以爲才至郡倅縣令與鄉之人士四方之賓旅
亦無弗才翁者然後知翁非果無能也程勞而後見察
行而後顯士之敦本尚質者類非可以易而知也翁姓
施氏諱俊字德宏月溪其別號也先世居秀水之麟謨
鄉後徙永樂之穆溪墅凡一十七葉矣世篤行誼稱循
俗云翁孝友悃愿養其親不以寔齋孀姊二人日給之
不以久替與鄉閭耆彥結白衣社相仁相卹以終其身
不以劬且費少懈也爲亭長里社平鰥寡無蓋已而長

區賦二十年賦常蚤入而民不病邑有百步橋當水陸
要衝而卑且圯過者難之翁一日出其資募工運石增
其高三之一堅緻倍之遠邇大快歲饑煙火弗接開廩
濟之賴以不殍者三百餘家或請納質劑弗受郡大夫
有疑必咨有事必委往往相賓遇俾以禮冠帶鄉里歆
動而翁處之泊如也翁少歷艱辛服田力穡無戚容及
處豐美無矜色惠普而益恭事辨而愈恪年高譽廣而
於小物也益勤是故無貴賤賢不肖才且賢之無間言
焉生天順七年三月二十七日卒嘉靖十年六月十六
日享年六十有九配陶氏子男二長聯陰陽學正術聖

陳氏次箴以例冠帶贅魏氏孫男二采秀俱國子生曾孫男二仁政有政曾孫女一聯將以卒之明年十二月日禘於未樂鄉先塋之次乃命采列翁行實秀奉以來請予銘予獲交翁祖子孫三世而秀又嘗卒業予門不獲辭銘曰

雲升于天或雨于田居高施卑理則宜然翁抱膏渥處下以也亦浹于鄉其澤津津孰若民上高爵豐且祿不布一籌皓首碌碌翁少食力不階尺寸乃克渙躬式昭義聞譬彼江河其水瀾瀾莫或揚之言潤九里氣蒸而騰霽彼四海翁所弗究在翁孫子

明故江西布政使司左布政曾公墓誌銘

公諱大有字世亨別號麟陂考諱開任蜀之捷爲教諭
公生於任邸自幼聰慧善竒對教諭公常心異之以爲
必能展已之志稍長博學強記弘治己酉以儒士發解
癸丑登進士第知定遠縣威惠並施民吏懷畏妖寇孔
布等攻城公以死拒戰賊勢衆盛力將弗支時太夫人
就養官舍公禱於天曰大有願死國矣惟老母在幸有
以祐之乃纔衆登譙樓以瓦斃擲下如雨賊被傷而退
舉家無恙人以爲忠孝之感賊旣退復設法追捕擒獲
百餘人當道交章薦之庚申春陞四川道監察御史適

冢宰缺廷議薦兵部尚書馬公而公疏以戶部尚書東
山劉公爲宜時中貴忌劉以其疏留中而遽下用馬公
之命然後出公疏誣以沮抑成命下之獄久之馬具疏
救釋復職巡東城事干貴勢者據法按問人多銜之賴
孝廟明聖獲免巡鹽河東詢知鹽池壅塞非溢則涸鑿
渠通黃河以時宣防無俾溢涸而鹽課之入數倍至於
今賴之巡按蘇常會海賊施天太等作亂公設策督戰
深入海徼卒靖二吳常人德之爲立生祠而逆瑾怒其
介邈論賞之典竟格弗行魏國公徐輔等古民田數千
頃公覈籍舉劾

朝廷命官往勘具得其情而輔遷以黃金五十鎰賂瑾
瑾矯

詔下公及勘官獄久之要以重賂常州官民爲公出數
百金將貸公死公聞之乘間謂其弟給事中大顯曰吾
寧以義死無寧以不義生給事君從之於是同事諸公
咸寢納賂之謀得削秩歸田而瑾猶怒公未已令出粟
二百石輸之極邊天下人共寃之而公畧無怨色家食
三年日以課子姪爲事怡然自得瑾旣伏誅起復職尋
陞兗州府知府流賊劉七等聚衆攻城甚急親王而下
咸欲自焚公統兵晝夜拒戰賊中流矢退去如是者三

壬申冬陞山西按察司副使提督學校充人追思立碑
於通衢公至山西行部考校從吏有納賄者公隨覺察
置於法適言官過其地誤於傳聞顧以爲公納賄也劾
之次譁以爲公必不然已而勘實果然言者愧焉甲戌
秋丁內艱服闋改除山東曹州兵備副使文事武備焯
有能譽已卯秋陞四川右叅政替年轉江西按察使時
宸濠餘黨疑獄未成公推義原情輕重合宜人無怨言
嘉靖壬午冬入覲便道過家見其子愬所爲多弗恪戒
之弗悛常怏怏不樂明年癸未三月還自京師竟以是
得疾是月二十有二日卒於正寢距其生成化改元七

酉十二月 日享年五十有九卒旬餘陞江西右轄命
下聞者惜之子男二長應也公歿之明年爲賊所殺次
裕性恂謹克世其家女一長適儒士夏高山次適監生
陶璠孫男二配 氏封孺人曾氏自教諭公以禮經擢
鄉魁公復發解登進士其弟給舍君今爲四川叅議亦
以鄉魁登進士君之子熒又以進士拜獻縣令而皆受
學於公科第聲業之盛教諭公所謂將展已志者尚闕
焉未可量也予昔視學湖南交於君茲復於蜀爲官聯
雅相愛用是聞公行爲詳君卜 年 月 日葬公
之原狀以屬銘銘曰

敏識貞心長材銳器錯節盤根愈試愈利利害窮通
死生之際衆皆退然公奮而厲遭時弗臧或起或廢
其在於我曾弗一蹟垂及耆年適違撫仕弗竟已施
亦稱先志三禮承家以授仲氏麟鳳之陂燁於世世
墓碣銘二首

明故封太淑人陸母王氏墓碣銘

粵稽古昔外以內基顯由幽積釐降興虞曰嬪啓周所
從來遠矣邇陸氏今日之盛而稽王太淑人之德不重
有徵邪碣諸墓道以風諭閨闈則化源攸闕其惡可已
太淑人王姓華亭之南錢人曾大父璘封大理寺寺副

祖禎父坦號承槐再世能散其貲

詔授七品散官承槐公娶章氏生五女大淑人其季也生而慧織紵裁製之事炊爨烹者之節不習而通讀女傳小學孝經諸書輒了其義笄而歸平湖陸氏爲故光祿寺卿東濱公配陸故鉅族光祿之父程鄉公復以文鳴吳越間光祿生而明睿塞淵程鄉曰吾平生恨不登第必是子也成之及太淑人歸外內嫻咸以得好逑賀弘治己酉光祿薦於鄉第一明年登進士第拜儀制主事馴至通顯每出太淑人必嚴扃鑰訓勅僕婢外內肅然蒸禴則親滌濯劑醯醬罔或弗虔賓燕致其洗腆宗嫻

或以宴困施予無靳容乃至脫簪珥亦終無德色也而
服疏茹非終其身無靡費常緝敗幃爲絮袴十餘每娶
婦出其一畀之以示約素承槐公沒無後親屬競取其
所遺太淑人獨號慟不輟銖忽無匹取見者嗟異光祿爲
儀制時閹人瑾嘗干以私不得矯制下之獄伯子今工
部侍郎杰抱太淑人膝以啼太淑人亦徬徨出涕旣而
叔浹執其子手曰大丈夫寧以直獲罪無寧以曲見容
兒記吾言侍郎舉進士歷官至都御史督工顯陵念太
淑人春秋高議請歸養怒曰王事之謂何而暇耶其私
侍郎乃不敢言比旣再受封猶身執女工以率訓諸婢

撫諸子慈不廢教諸子夜讀未嘗先即安至教諸孫亦然夜半家人皆寢中堂膏火獨不滅刀尺鏗然也故光祿父子居官名清白而其衣食乃有餘饒焉善記憶往事談先德必究其積善獲福之源以迪戒子姓接宗黨婦女風勸以德義視他人恫瘝如在己初遘疾姻黨奔走相望不謹之日哽涕接迹其門云生成化丁亥五月二十一日卒嘉靖癸卯十二月十七日享年七十有七子男五長卽侍郎杰次棐大理司務次槩邑庠生早卒次杲刑部主事次集鄉進士女一適國子生華亭朱登孫男九光擢侍郎出以蔭補國子生光宅大理出光祖

鄉進士光裕庠生光祚鄉進士刑部出光儒光倫俱庠
生光儀進士出餘幼侍郎將奔喪歸

上爲賜祭若菴歸數月將啓光祿公塋谷塋太叔人而
昭揚其潛懿于胥山之陽乃以國子祭酒少湖徐先生
所爲狀命弟集奉以來謁銘於予予始筮仕光祿公方
蔚負時望比于今日獲交其子若孫皆直易溫文紛綸
炳聲績固謂必有自焉而少湖祭酒於予雅相信銘奚
容辭銘曰

終溫且惠婦德之良於太淑人具受厥臧性安儉非
蔬食漱裳特其豐羨親賓蒸嘗又有遺貲曾弗染指

時其嗣而脫我簪珥絲象銖積丘襞綺綺視我故幃
罔習于靡與與仁慈疾疢猶已肅肅戶庭孰敢干紀
夫蒙大難呼吸生死倉黃泣涕以誨其子毋尾以全
寧壁而毀坤柔之貞乃鈞烈士維其完德相夫成名
施于子孫紛綸鏗鐙胥山有碣太史是銘采偕君子
繩繩寵靈

明故中憲大夫常州府知府致仕吳公墓碣銘
公始諱楮更諱桓字廷用鄞人正統末以家富例徙籍
京師公時未弱寇請代父徃弗許則進日兒寧終伍齊
民耶藉獲霑一命卽是後蠲矣遂行景泰癸酉領薦京

闡成化改元授汀州府通判時汀守以疾在告公攝長
貳之職剽繁劇持柔革強悉有繩度能聲日起先漳
州一武臣負富次橫嘗忿疾其同僚擊殺之率以賄餌
勸官獄十年不按公往讞立驗服法漳自獄起書聯及
公甫辨而天忽朗耀人心快焉上杭爲汀屬邑素剽悍
溪南尤負固善反側四年戊子

上遣廷臣視其地民無故駭懼謀亂公覺卽行邑致民
于庭諭

德意陳逆順禍福衆感服退訖公去任帖然興化缺守
當道以公爲宜交章薦于

朝會已命守不果授持憂歸服除常州特與郡賦拒邑屬私錢之贈歲數千緡蓋黜其弊習督賦不用笞罰召逋租者謂曰若屬負官課罪在典者奈何民益感懼不踰日遂集轉同知職清戎利弊不遺毛髮制使有要功生事者苛郡邑必致軍丁郡邑吏承風旨鈎剔牽連至誣民爲軍公獨持不屈不變則爲辨列民情從容詳悉制使悟進公堂上謝之弘治己酉秋滿陞中順大夫贈封其父江通判母徐繼母朱妻邵皆安人常城之再議搆建也推公董其役公曰城故湯信國經營基極壯固理新則易撤舊則難辭不與守弗聽竟新之已而城且

完且圯守始以不用公言爲恨凡閭閻欣戚富勸羸
知無不悉處之如家務在便民不屑屑較期會民或控
道左輒停舟駐蹕訖其事去曰毋滯之令瘼業也郡饑
蠲賦例視田高下巡撫欲市恩豪右茂例若瘼楮公力
爭允其十二猶銜公異已疏請更任執政者詢知事由
寢其奏通判秩滿例有遷拜民乞留監司者萬計同知
九載報政亦知之故公仕三十年終始郡職前後踰七
考不離常州甲寅乞歸特進中憲大夫常州府知府致
仕閏三載丁巳月日卒距生

享年六十有六葬其邑西嶼山新阡之原子男三照登

私治已酉鄉薦歷漳南確山縣令勲豐城候教讀杰郡
庠生孫男

吳泰伯之後以國氏有官趙宋時來勤家所東公祖諱
道生日殷二府君再遷甬東西一舍地葺湖之滸先是
府君遭術人告曰君居當遷遷後有顯者已而果然公
平生服食節約蒞政精勤老壯一日溫良慈異不見畛
域而中屹不搖其去常而歸士夫獻頌耆倪悲傷婦子
垂泣攀送越境依依不忍去及聞公喪賻奠交至邦奇
自茲仕每過常常人必問公子若孫何如之四方值常

大夫士亦然蓋公去常既數十年矣而人之頌慕益深以故雖生晚不及識公而聞公熟甚且家世相厚獲接公子孫曾三世皆文雅明粹克世家學而外內雍肅庭無間言吾鄉言禮教必先吳氏縣令君昆弟將立碣墓左命邦奇銘辭不獲謹述都諫盧先生瑀所著行狀爲叙及銘銘曰

相古循吏惟漢爲多歷世既遠如公幾何惟君厚民久任成績苟非其人去恐弗亟公來晉陵稚子歡迎旣也携幼送公南征以長以成以生以育我食我衣惟公帛粟宜此吳氏思如考妣見公鄉人問厥孫子

公之孫子咸克如公天聽自民式光無窮

石槨銘

先君石槨銘

維嘉靖十年辛卯秋九月

天子命有司營垆域于樞源鄉葑港之原窆我皇考封
通議大夫南京吏部右侍郎洞雲府君冬十有一月六
日石槨成十有二月十有七日乃窆銘曰

嗚呼茲維我皇考之攸臧維天監厥德維神護厥宅
歷祀千億

家母壽藏石槨銘

大明封太淑人沈氏壽藏嘉靖十年辛卯秋九月蒙
皇上恩命有司造墳葬我先考侍郎府君時太淑人年
八十矣乃并造石槨十一月六日槨成介男張邦奇謹
爲銘曰

毋壽八十乃克歲制維娛于千歲

壙誌

故外王父櫟隱沈公暨外王母何氏孺人合葬
壙誌

沈四明舊族宋有諱存中者與晦菴朱文公同榜進士
世以詩禮相沿公諱諤字慎言隱居櫟陽號櫟隱曾王

父愷六處士諱爰王父悌十二處士諱德毅父忠十七
處士諱紳字服儀號月潭世有隱德公悻朴簡質不屑
屑治生事而好談舊風崇古格賓祭婚聘之屬雖費無
所計又耻自崇殖少有畜輒揮散之必罄乃已當食遇
童孺來前悉推所食食之率以爲常家用是漸落徃徃
窘困無所悔偶有符卽復施予如故櫟陽故市也屢虞
櫛比而衢當諸邑水陸之衝有官河橫且其間農商病
涉公悉捐其貲率從弟其倡里人造石梁營甃屹屹不
間寒暑橋成人至今德之晚年誤跌仆折足吾母迎至
吾家扶護饋養時其以翰林檢討奉

命歸省親見吾母躬溫清叨澣滌備極孝敬如是者幾二期而公病革思歸歸數日卒正德甲戌八月八日也距生宣德庚戌二月二日享年八十有五配曰我外王母孺人何氏揚州學訓導楚源先生女弟也柔巽靜默無少愆違而纂組締繡精絕流輩生宣德戊申十一月二十七日卒成化壬辰十月十六日年四十有五公之生少孺人二歲遂終身不復娶君子謂公於是乎義生子一人曰我舅氏左菴先生字斐張氏繼娶林氏我母歸我先考洞雲公實佐義方以成我兄弟某旣獲幸進考累封至南京吏部右侍郎母至淑人考沒贈太子賓

客吏部左侍郎兼翰林院學士母加封太淑人自始封
至是三十有五年而儉素如一日云孫女二人處懽張
出適蘆江鄭尚廡處幙林出適縣城陸大綸我王母之
沒公葬之所居南祖營之次公沒之歲月日舅氏舉柩
合葬焉而誌石久虛則屢以命其惟公平生瘠已瘦人
乃主約窆以老寔維委慶我母以及于不肖德其可忘
舅氏究三禮六書善解章句古行絕俗今年八十有五而
吾母九十有三皆康強未艾優游祿養是可以慰公之
心也夫謹據舅氏所列事狀叙次刻石置之擴補
張文定公靡悔軒集卷之十